

李紅權 輯錄 點校

明季遼事文集叢刊

孫承宗集
中

國家古籍整理出版專項經費資助項目

寧夏出版社

明季遼事文集叢刊

孫承宗集

中

李紅權
輯錄
點校

孫承宗集卷十六

制詞

原任禮部尚書兼東閣大學士贈少保謚文端王家屏

制曰：朕祇承大業，光撫洪圖，仰遵列祖之貽謨，式叙五朝之元碩。蓋上哲不貶忠以阿世，乃英明或藉法以行權，故迹若睽而深信其心，身雖遠而終行其議。對凌風之勁草，念夾日之誠臣，可靳新恩，以旌往勩。咨爾原任禮部尚書、兼東閣大學士、贈少保、謚「文端」王家屏，沉凝疆毅，冲粹坦夷；閱歷廿年，久禁嚴之近職；周旋二紀，更侍從之要官；進陪帷幄之司，載任股肱之重。當先皇帝升儲未定，適先皇祖猜意方深，將順者術疏，而衆攻其短，糾繩者力盡，而式遄其行。蓋上以終當相信之心，持堅不可開之勢，兼以時有可乘之惑，掩必無終晦之明，乃因勢以啓其心，希緣明以破其惑，喜引之爵名而不顧，怒加之放逐而不移，經綸竭補袞之才，肝膽傾回天之力。豈獨群情倚以爲重，遂開仁愛之心；抑且九重據以爲辭，藉塞讒譏之口。倡天下以必不可回之正志，見朝廷有誼不戀位之大臣。故旁謀逆折于公忠，王意頓窮于弃置，此天生名世，以維有道之長，而誼篤忠貞，遂衍無疆之曆。茲以覃恩，加贈爾太保，錫之誥命。於戲！庭謨惟直，國本有經，假調停，聯四海之心術窮，而衆將益渙，借阿諛，通九重之意道輕，而身竟不光。唯是執憲典以陳謨，乃能佐轡銜而馭世。人知直言不諱，其氣伸，不

知婉畫開陳，其心苦；人知正色有辭，其力大，不知當機立斷，其識沉。蓋變調勛茂，本格心翼羽，功成于佐聖，老成既謝典刑，尚可風人忠惻，不磨丰采，猶能裨治，贊畫（書）無數，舊德惟馨。

少保兼太子太保戶部尚書武英殿大學士方從哲

制曰：朕祇承先緒，光紹丕基；遵訓揚功，仰憲祖宗之舊德；銓時揆策，式資弼亮之元臣。惟勛庸懋著于三朝，乃位望特高于一代，眷爾褒崇之貺，昭予眷倚之懷。咨爾少保兼太子太保戶部尚書武英殿大學士方從哲，直亮小心，忠清雅量；辨精白于渾金璞玉，而主以嚴恭；銷聲聞于大呂黃鐘，而恬以靜密；蚤登侍從，薦陟高華，銅龍試黼黻，弘猷壁水；裕變調遠略，載養澹寧于都輦，夙標風望于宰衡；荷神祖特達之知，八年而功勤納牖，膺先皇倚托之重，浹月而政下如流。上獨操之不分，既永肩而默成爲苦；下交責之未解，或入告而補綴爲勞。佐恭默于攬政之朝，定倉皇于彌留之際。救時所易格，事定而已不必居；竟力所可爲，道潛而世或未覺。念今之師師濟濟，賢豪雅相和于同流；想嚮之斷斷休休，彥聖原無妨于若己。肆朕纂臨之始，更嘉翼戴之勤，罄抒盡瘁，深衷日謹，謨明體要。蓋國家多難，正危疑震撼之秋；元碩效忠，在利害成虧之外。茲以覃恩，授爾階勛光祿大夫柱國，錫之誥命。於戲！進退立身大義，豈敢後于潔身；安危在國重臣，乃更先于體國。古人一諾，輒傾心腹肝腸；顧命兩承，而惜翼爲明聽。業許身親于堯舜，其寧自遜于皋夔。事君致身，當念葉成；衆口用汝，作礪何嫌；攻玉它山，尚其正色；立朝百官，寅恭之訓，同心輔政，萬民康定之休。欽哉！

戶部尚書李汝華

制曰：朕以冲人，光膺大籙，特嚴民部，深計天儲。念先人殫力以居，傾朝不可，而今乃蒙功及後世，據圖以用，舉國咸歡。而終或不繼，故遺恩難恃，而舊法當修，眷予喉舌之司，竭爾股肱之力。爾戶部尚書李汝華，清嚴而拆計精詳，沉敏而矢心匡定；蚤標規格，不避強宗；兩都薦曆清卿，四履光開雄甸；迨酌元斗杓，遂正位臺司；十年獨苦于節宣，百計力支于幹濟；直參便利，而婉弭傷心；虛集衆思，而公調多口。先皇祖封椿似吝，而爾力散小儲；先皇考發帑如流，而爾先核實用。蓋老成致主，計一身爲織，而計國家大；遠略匡時，安一隅爲少，而安社稷多；曠典總三朝之閱歷，弘猷合四紀之經營。茲以覃恩，授爾階資德大夫，錫之誥命。於戲！爲天下守財，敢愛瓊盈之積貯；念民間若掃，忍忘稼穡之艱難；顧戶鮮均輸，廩無常，滿九伐當三空之日，一朝合五禮之全；增賦而覽乞賑之章，請蠲而下搜括之令。肆予踐祚，念爾持籌，緬維顧命之元臣，曾屬弼予以堯舜。詎蔑生財之大道，而輕算訾于舟車。勿入豐而詳核逃亡，勿出嗇而偏稽虛冒。朕惟求舊，爾尚圖新。欽哉！

禮部尚書兼翰林院學士孫慎行

制曰：朕祗紹宗閔，希光制作，唯南宮之地峻，繫東觀之職親，眷我誠臣，裨予新治；曳履上星辰之色，方密切于維毗；持荷調喉舌之司，特先加于寵命。咨爾禮部尚書兼翰林院學士孫慎行，清修直節，邃學沉衷，以精明果毅之襟期，抒正大剛中之風采，久騰英茂，薦歷高華，

名蜚侍從之班，道重寅清之貳。而爾恪奉祖宗之成法，力絕臣子之私交；當先皇養晦之年，正藩國就封之際；心存夾日，矢九折以不辭；力欲回天，抱孤忠而直上。大道既通乎宮府，恬踪遂賁于丘園，特念舊勞，召還今秩，峻業彌揚于朝宁，夙謨方企于冲人。茲以覃恩，授爾階資政大夫，錫之誥命。於戲！身係朝端之重望，心懷天下之先憂，非堅定，不足成功，唯公清，乃能持世。自昔紛紜之日，迄今底定之朝，尚賴耆賢，兼茲委寄。人惟求舊，冀神人上下以咸和；動必有常，庶風俗人心之丕正。欽哉勿替，光我訓辭。

都察院左都御史張問達

制曰：朕聞結綬彈冠，萬寓適維新之會，振衣挈領，九重嚴獨坐之權。提英鑒以奉國維，開大紘而揚天紀。倘浮游未盡，曷增日月之光；惟綱目堅持，始快風霜之任。特登功于芝簡，載錫命于蘭臺，爾都察院左都御史張問達，端凝沉毅，博大精詳，廉平譽起于花封，蹇諤聲揚于梧掖，遂以容喜禮樂，出披楚甸，甲兵迨入主于邦刑，載借籌于國用。群情以四紀之經營而熟，不藉調停，大典以三朝之閱歷而精，寧惟曉鬯。適簡憐于先帝，乃調護于朕躬。親承玉几之慈謨，茂著鐵冠之風采。昌言國是，百官披忠直之猷；正色朝端，三窟屏權豪之氣。當廷爭之未決，持中正以渙小群，即衆議之或囂，足虛公而佐人治。爾既思忠于先帝，予方求助于舊人。茲以先皇帝覃恩，授爾階資政大夫，再以朕覃恩，晉爾勛階資德大夫，正治上卿，錫之誥命。夫法久敝生，吏弛人玩，任之則廵委，久而優容多，嚴之則鷙擊煩，而摧折衆，人各分塗于同异。爾惟遵道于蕩平，勿以獨斷之機，概從集議，勿以大公之法偏任同心，力振其夙迷，則沉陰之聞霆而破，徐而俟其自化，如漉雪之見日而消，倘祖宗之法度克修，即朝廷之德澤偏

布，雖小臣之藩籬未剖，而耆碩之衡鑒常虛。念予訪落初心，罄爾匡時大略。欽哉。

兵部右侍郎張經世

制曰：朕聞朝廷維社稷之安，遠計特儲于借箸；元碩托國家之重，壯猷先倚于當機。蓋韜鈴不可以意營，而軍旅寧能以嘗試。惟豪杰抱兼資之具，不難出入均勞；抑疆場有歷閱之身，適可安危獨注。爾兵部右侍郎張經世，幹度凝山，襟期峙玉，用堅貞于諳練，抒精敏于沉雄。適晉佐于樞廷，俾端司于廟算，念四方之多故，或九法之乏人，輕詵者猝嗟爲威，冗豫者依違有態。予惟經政，爾以除戎。蓋紫馬行春，輒負秉麾之望；碧幢映日，更嫻司武之猷。且嫺易之威名，紀綱上郡；即谷雲之方略，鎖鑰北門。是惟端凝博大之材，兼歷錢穀兵刑之任。故望昭輕緩于華戎，式展元英之風度；籌運謨謀于帷幄，丕揚神武之天聲。茲以覃恩，授爾階勛通議大夫資治尹，錫之誥命。於戲！昔當清晏，即端委可以折冲；今值艱難，豈笑談可以鎮物。又況持膏梁已疾者，蘊毒益深；假尸祝代庖者，兩官俱曠。是惟遠輯摧陷廓清之略，近資發縱指示之奇。兵緣將勇而精，重念徙戎之論；餉以士強而減，應先安內之謀。蓋歷久則人盡其材，任專則宦得其體；聞旅紛而自若，惟企爾以專功，當大事而獨先，尚副予以制勝。欽哉！

原任南京戶部右侍郎兼都察院右僉都御史余懋學

制曰：朕方嚴名實，以破詭隨，旌讜直，而激浮競，乃權謀假重于綜核，或僞辨借名于流

品，眷焉之耆碩，蔚爾公忠，尚崇簡德之深思，式報匡時雅略。爾原任南京戶部右侍郎、兼都察院右僉都御史余懋學，勁節孤標，赤城玄度，一參郡憲，薦貳留曹有猷，入告一人據古，不阿當世。緬予初政，念爾昌言，政虞猛而爲殘，氣患矯而成激；慮先曲突，砥狂熏轡之先；誼慎和衷，拔幟凌囂之會。蓋識能見遠，學不近名，故置身夷險之中，脫念成虧之外。方其報最，適切投簪，載更介弟之風猷，重念老成之績序。茲用贈爾階通議大夫，錫之誥命。於戲！束髮登朝，寧有可私之耳目；比肩共主，誰居不剖之藩籬。唯材誠不用于朝廷，乃膽智遂絀于身世；想風規之落穆，尚有典刑；撫政局之紛紜，永言穆頌。懋嘉舊烈，祇服新綸，爾惟歆哉。

制曰：朕聞學如居積，道若張弓，用以久蓄而饒，後以前絀而大，有媿世業，載荷國章。爾原任四川重慶府合州知州、贈奉直大夫余世儒，乃原任南京戶部右侍郎、兼都察院右僉都御史懋學之父，學不愧于科名，行期追乎往誥，故澡身浴德，砥節首公，入當爲己之儒，出稱字人之吏。即喜形義檄，尚餘抱璞之懷；迫業授章經，茂啓趨庭之訓。德業相成于奕世，忠貞盡萃于一門，不有崇褒，曷酬善慶。是用贈爾爲通議大夫、南京戶部右侍郎、兼都察院右僉都御史，誕膺如綍之華，永錫無窮之聞。

制曰：國重公忠之上佐，載肅朝常，家需辦濟之淑英，式操闔範。惟識超帷薄，故道啓蘋蘩。爾原任四川重慶府合州知州余世儒妻贈孺人、再贈宜人孫氏，乃原任南京戶部右侍郎兼都察院右僉都御史懋學之母，辦族函貞，德門作配。當其孝嚴虔閣，敬給傳餐，使其君子內奉中庭，外交當世，入無違養，出有良朋。至若佐燕翼之謀，能勞愛子，當負芻之交，大誼存翁，則閨芳遂比須臾，家學頓成聖善矣。是用加贈爾爲淑人，絲綸貽女史之芳，松檟顯慈庭之懿。

制曰：蓋聞朝昌衆正，族大多賢，故填篋迭奏于虞庭，杞梓交加于謏背，怙恃維均，式穀生成，不問劬勞。爾原任四川重慶府合州知州余世儒繼室封孺人、贈宜人胡氏，乃原任南京戶部右侍郎、兼都察院右僉都御史懋學之繼母，禮科給事中懋孳之母，識函德慧，性秉淑貞，上

承道德之名賢，下撫忠貞之良佐，迨于哲胤，爲我盡臣。直躬競爽于難兄，雅志竟成于是父。眷凌霄之一羽，再覽鳳毛；握合浦之雙珠，齊輝月暈。夏理夕郎，奏記式嘉，民部成勞。是用贈爾爲淑人。榮名益大，仰酬靜樹之思；潛德彌芳，用佩芝函之寵。

總督宣大山西軍務兼理糧餉兵部右侍郎兼都察院右僉都御史董儒

制曰：朕惟纂錄承圖，予寧萬寓，投戈息馬，佐重元臣，矧地控雄邊，望隆闡鉞，夾兩庭而甲左右之中權，拊萬落而壯陵京之大勢，自匪材兼文武，曷能任總綱維。爾總督宣大、山西軍務、兼理糧餉、兵部右侍郎、兼都察院右僉都御史董漢儒，氣格沉雄，風規峻朗；才能肩重，而出以真誠；識可當機，而持以縝密；起家淑問，薦歷高華；閱襟喉鎖鑰之名區，任錢穀兵刑之遠計；凡畀提衡之重，僉云經緯之長。以故才由展錯而彌深，識藉擘裁而益鬯，即在懸車之日，更精借箸之籌，既若予工，乃固吾圉。錫龍旗而賜履，佩充鉞以登壇；伏久著之雄名，風行草木；運靜綜之虎略，膽破旃裘。茲以覃恩，特從新銜，授爾階通議大夫，錫之誥命。於戲！昔我皇祖誕任老成，當建議于谷雲，實調和于將相，迄五十年之定業，壯千百世之鴻圖。然而法久敝生，兵驕將玩，吏所憂在胥紕之鹽，惡行徼之奸蘭，起視吾蛇而已。卧地所急仕，漢法之將窮，戎索之幾頓，倘一嘶口，馬其何支。是唯于蕩佚簡易之中，先制節精詳之慮，淨三陲于兩幕，聯九塞爲一家。念予用舊圖新，方藉英雄之膽智；以爾長材大略，當爲經久之謨猷。欽哉！

制曰：蓋聞約詡能廉，富好行德，乃若公清獨矢于華溫，仁義饒聞于里巷，坐策當世之故，遠貽燕翼之謀，曾受爵于東落，更升華于北鑰。爾累封通奉大夫、湖廣布政使司右布政使、贈

正議大夫資治尹、工部右侍郎董萬斛，乃總督宣大、山西軍務、兼理糧餉兵部右侍郎、兼都察院右僉都御史漢儒之父，衡泌姱修，瑾瑜偉抱，積而能散，貴不忘沖。爾其解衣衣寒，推食食餓，逸軌素孚，月日嗣賢，載振風徽。若夫刑持丹筆之平，權減行舟之算，促裝典鐔，著論司漕，罔不後兒女之私，而唯先國家之計。蓋俠行本其天性，雄風具在家謨，蔚爾官成，翳唯庭誥。是用贈爾爲通議大夫、兵部右侍郎、兼都察院右僉都御史。弓冶（治）流輝于百世，松楸昭慶于重褒。

制曰：國重元臣，曠典與勛庸而并盛，家榮令子，慈恩偕毛懷以爲昭。蓋世既謝其徽音，而道尚留其懿範，可無懽冊，以體遐心。爾累贈淑人盧氏，乃總督宣大、山西軍務兼理糧餉、兵部右侍郎兼都察院右僉都御史董漢儒之前母，蚤以淑資，歸于介士；必敬必戒，持家忌拮据之勞；不競不綵，鳴佩效贊襄之儼。爾其載成士行，式佐高風，相莊于俯仰之間，交劑于居儲之會。而桓修自御，冀鑑無遠；在握三珠，竟隕夜光于月蚌；凌霄一羽，尚留瑞色于蘭陔。是用仍贈爾爲淑人，儲嘉祉于采昆，揚芳徽于奕世。

制曰：蓋聞天錫寵于誠臣，百膺多祉；朝疏榮于上壽，五錫鴻名；展雄略而道益彰，扶鳩筇而祿益大。爾累封夫人，以丙秋改封淑人張氏，乃總督宣大、山西軍務兼理糧餉、兵部右侍郎兼都察院右僉都御史董漢儒之母，端莊純一，溫厚慈和；遵令範于圖經，迪義方于機杼，清節不綠却餉，忱心匪以導輿。爾其鶴髮翩翩，鸞章煒燁，歷五朝于百壽，合四世于一堂；袍擁赤霜，修玳筵而按夔鼓；丹成絳雪，繞蘭苗而捧彤書；方資龍首之英猷，重下螭頭之渥錫。茲用仍封爾爲太淑人，高華彩結，雲霞徽省，耀崇班之氣色；清切光依，日月蘭臺，分內秩之榮名。

原任經略遼東贊理軍務兵部右侍郎兼都察院右僉都御史熊廷弼

制曰：昔我先皇祖念三韓中六合皆兵，妙選獨出之才，弘濟孤懸之鎮，衆皆贊其特簡，上更倚爲長城。當大慶之方深，矧膚功之可奏。爾原任經略遼東、贊理軍務、兵部右侍郎、兼都察院右僉都御史熊廷弼，雄識脫成虧之外，駿材超利害之中。爾其司法天圻，抗凌西憲；當登車東下，抱澄清天下之思；及投策歸來，更大繫中朝之望。會爾風烟之未靖，僉云經緯之兼資。念先皇祖撫髀外寧，迨先皇考倚廬東顧。而爾膺兩朝之重寄，當百戰之孤城，既嘔心以荷劍龍，日携膽而馳雲馬。先謀後戰，未遽煩大創之師；雷逐電行，業先握萬全之算。振軍聲于積弱，懾沴氣乎方張。萬里龍荒，忍見「虜」塵之聳；千年鶴表，仍增漢壘之雄。即成謀，尚隔于人言；而大略終維于國是。茲以覃恩，授爾階通議大夫，錫之誥命。於戲！天生豪杰之材，寧惟身許；世篤忠貞之佐，蔚以國籌。遽云一壑之特安，尚念三朝之異數。白山木葉，業保固于丈人；蠆毒狼心，更潛窺于謀者。集烏合而起，繫豈異人；運龍首而謀，祇需後命。佩我康侯之蕃錫，企茲方叔之壯猷。欽哉。

整飭薊州邊備兼巡撫順天等府地方都察院右僉都御史李瑾

制曰：朕光纂洪圖，綏寧方夏，唯是大中丞激揚文武百吏，以惠元元，而京國依日月光際，上有大澤大征，恒先被之，至倜焉東顧，不翅雄要于東也。念我誠臣，寧需閱叙。爾整飭薊州邊備兼巡撫順天等府地方都察院右僉都御史李瑾，識量宏深，操持清辨，惠政夙揚于蜚鳥，直

聲允著于伏蒲，抨彈不避強宗，議論獨特大體，既高文對，乃貳奉常。嚮安丘壑之中，衆其欽爲泰斗；頃拔雲霄之上，人咸擬以星鳳。遂鎮天圻，予以節鉞，猷望雅孚于四履，關山盡在清寧；威名先布于十連，草木亦欣德化。蓋三韓未靖，四輔爲騷，糾虔將吏于威嚴，綏靖兵民以鎮靜，允稱神皋之重寄，將折戎塞之遐冲。茲以覃恩，授爾階中憲大夫，錫之誥命。於戲！久安則政易弛，多事則人易劇，方今天下或類此乎？薊門爲東塞聲援，不獨蔽陵京也。古人未雨徹桑，定其中流，而忘衣袵桃林之議煩爾矣。竟爾材操，堅爾心，以肩我大任，尚無忘于保介哉。惠此京師，以綏四國，予日望之。

總理督糧提督軍務兼巡撫應天等府地方都察院右僉都御史王象恒

制曰：朕光纂洪圖，祇寧方夏，深惟根本，特簡元僚，無亦曰：「高皇帝有遺弓焉，而輕之也。總風紀以保釐元元，朕其有愛焉。」爾總理糧儲、提督軍務、兼巡撫應天等府地方、都察院右僉都御史王象恒，材緣駿迅爲沉凝，識以端詳爲敏劭，一蜚鳧舄，載插豸冠，既久歷于蘭臺，遂參丞于同寺，以神皇之簡在，越先帝之特掄，肆以冲人，倚于舊德，乃予旄鉞。往又陵京十連合財賦之區，籌謨審慎；四履綰紀綱之任，憲律清嚴。蓋幹聳孤霄，霜溜千尋，瑤岫標凝，峙玉露寒，萬壑清冰。其振采于留臺，尚令憚黯；業升華于橫榻，無以易堯。茲以覃恩，授爾階中憲大夫，錫之誥命。於戲！地重不可劇也，民罷不可紛也，東南民力，自昔念之矣。爾嚮者不扼腕吳人之凌囂乎，無以勝之，有以安之，則籌邊之方略，按部之風棱自在也。伫爾新庸，光予遠計。懋哉。

制曰：國家普如天之貺，匪盡明庸也，而特重勞臣。又況世篤忠貞，開予大烈者乎。夫人

地之光華，寧床笏門戟爲誦詡也，前以爲堂，後以爲構矣。朕且爲御史大夫念之。爾通議大夫、浙江按察使王之猷，乃總理糧儲、提督軍務、兼巡撫應天等府地方、都察院右僉都御史象恒之父，蚤以甲掄，仰承世學，而出揚淑問，入佐寅清，發奸調衆庶之和，陳令作藩封之範，載更藩臬，益著謨謨。每先事以爲防，盛當機而立斷；雷雲渠雨，安魚沸于狂瀾；甲首丁男，修鱗屯于宿飽。蓋地盡中原之雄要，謀先經久之鴻圖。爾其既重天常，特隆風節，即天皇所譴怒，亦以周旋，而肯阿承直指，雖帝子之遨遊，不難論諫，而況曲制中涓，尚存罔正之庭模，載啓中丞之節鉞。是用贈爾爲中憲大夫、都察院右僉都御史。蘭函隆錫，從中秩以爲華；槐蔭清光，蔚南臺其未艾。

巡撫宣府都察院右僉都御史張經世

制曰：朕統承方寓，綏靖邊陲；有赫東征，特注詩書之佐；憫焉北顧，尚嘉文武之猷；內拱陵京，外當肩背，以千百世中興之盛際，馭五十年解辯之伏戎。緊重任之難勝，豈榮恩之可後。爾巡撫宣府都察院右僉都御史張經世，識超利害之中，而操持獨力；氣拔功名之外，而涵養特沉。當其明允成能，度支有譽；載典股肱之郡，輒注邊材；屢參屏翰之司，更閑將略；廷議共推上策，朝廷遂倚長城，以上谷之節旄，當北門之鎖鑰，念口狄爭相雄長，爲中原制勝之機，然犬羊所在生心，亦邊徼跳梁之漸。于是糾虔將吏，安輯兵民，齊戎律以振風稜，揣〔虜〕情而悉要領；威知草木，名怖啼兒；率是羆熊，快旌旗之變色；整斯鵝鵠，知金匕之非常。蓋韜鈴略法乎威嚴，輕緩維持以鎮靜；當機省括，即未雨厪桑土之謀；先事致防，豈中流乏衣衲之戒。茲以覃恩，授爾階中憲大夫，錫之誥命。於戲！大臣出則戎口走于帳下，入則甲兵具在

胸中。爾既貳洪樞，遂參邦政，即一隅尚屈群力，豈九法而遺衆謀。尚其大簡車徒，令士有陷堅之志；益嚴帷幄，俾人皆投袂之思；勿以首像而耽外寧，勿以鴟張而挫內銳。即法嚴中制，而箸籌特主于樞機；雖情自內依，而戎索獨提于股掌。犁庭空漠，副予一人簡在之心；飲至策勛，慰今天下清寧之望。欽哉。

巡撫江西地方兼理軍務都察院右僉都御史房壯麗

制曰：朕光承大曆，祇綏方隅，所賴執憲大吏察舉郡國，守令諸臣遂以宣導上澤，疏通人瘼，自非仁而不縱如光，威而不刻如峻，誰夫弄印以畀者。爾巡撫江西地方、兼理軍務、都察院右僉都御史房壯麗，識度宏深，操持潔慎；才能任重，而入以純明，識可先機而持之縝密，威惠夙揚于壯縣，公忠久著于法棱。方持棘署之平，遂執蘭臺之憲。內封四履，則江湖陵澤之雄奇；外接十連，則吳、粵、荊、淮之保障；綏輯惟持以鎮靜，糾虔略法乎威嚴。藉六察之風威，驅除苛吏；抒五刑之平允，衽席窮檐。蓋廉直勁正之操，規模常遠；節義文章之地，拊綏爲勤。正宜異數之頒，況值慶條之布。茲特授爾階中憲大夫，錫之誥命。於戲！爾所部則藩封之供億爲艱，而角北湖山，無得治絲而棼之也。陶之役，頃從減省，得無有不解者乎？久安則綱解，多事則民煩，懋之哉！還祖宗以舊法，即予天下以新恩，寧獨天柱寶極，間有寧園也。企爾行矣。

通政使司通政使王舜鼎

制曰：朕光膺大命，嘉與維新，廣延不諱之書，悉體登聞之願，所期宣上之澤下究，求人
之瘼上聞。唯爾納言，祇承朕命。爾通政使司通政使王舜鼎，秉沉毅之資，而寬明簡惠，有清
嚴之守，而忠亮篤誠。起自爽鳩，晉躋司馬，既揚歷于雄藩，遂旬宣于劇部。入尹神皋之重，
載清都輦之塵；肆予踐祚之初，乃改陪京之命。以心膂而司喉舌，緣出納而披琅玕，遂使堂下
之謀概暴于乙覽，遐方之論不隔于九重，師望允諧，朕心則懌。茲以覃恩，授爾階通議大夫，
錫之誥命。於戲！天下之志在通，人主之心欲遠。以我先皇祖之恭默，或鬱鬱而未舒；洎我先
皇帝之彌留，尚通而未久。倘間左有未伸之意願，則朝廷無偏布之仁恩。況予方速昧之年，且
國值艱難之會，智急先務，朕當加意于轉圜；道本人情，爾尚注心于掌輿。祇承朕眷，無替訓
辭。欽哉。

通政使司右參議呂邦耀

制曰：朕以冲人，光纂曆服，方期包荒茹彙，通百壅以悉萬隱。易不云乎：「天地交而萬物
通也。」一出入朕命，惟爾納言。爾通政司參議呂邦耀，清修勁節，遠識沉心，擢對大廷，抽毫
中秘，生長輦轂之下，既習朝嘗；出入禁闥之中，載嘗國政。迨提衡河洛，乃益鬯謀猷，晉參
喉舌之司，伋廣目聰之益。而爾自矢丹心日皦，人推青瑣風棱；一疏建元，特展尊親之大孝；
再談講幄，獨抒憂國之深心。念老成雅意敷陳，想明允克詳出納。茲以覃恩，授爾階奉政大夫，

錫之誥命。朝廷唯望謏斯嚴，而以人之瘼上聞，乃更亟也。往聞要人所欲扼，頗有壅而不得上者。夫草野豈盡嘉謀，而衆思可集，故壅乃否，疏其壅乃泰，通以爲疏也。爾尚省爾官，篤爾初忱，佐予新政，朕乃庸。

日講官詹事府少詹事兼翰林院侍讀學士協理府事錢象坤

制曰：國家設端任爲彈肅，微獨弼諧儲副也，實將資忠亮，翼帝學。肆朕冲昧，光纂洪圖，所賴豐芑舊遺，以沃于朕志。其念宿學，乃更殷也，可靳榮冊。爾日講官、詹事府少詹事、兼翰林院侍讀學士、協理府事錢象坤，沉心秀骨，亮節宏材，射策大廷，抽書中秘。爾其學厯匡濟，肯專目于文雄；志切澹寧，不受攪于世蠱。念皇祖拔奇材于禁近，洊躋中護以延芳；迨先皇簡峻品于東朝，遂踐儲端而插羽。洎予訪落，晉爾談經；身依日月，聯延乂于光華；班綴蓬瀛，首群英而領袖。蓋詞成盤誥，代得麒麟，業超文士之宿摹，尚屬儒臣之舊事。惟爾倡予，和聲相應于一堂；且析義陳辭，道頓洽于積日，乃關朕學，式懋爾功。茲以覃恩，授爾階中憲大夫，錫之誥命。頃閱群臣交牘進予學也，念冲人不學于元子之初，而憫焉踐祚，其敢忘焉。明新德業，爾實始基之。易不云乎：「富有之，謂大業；日新之，謂盛德。」爾尚堅爾心，弼予德，以奏大業于天下。朕不忘學也，其敢忘佐予學。懋哉，以需遠注。

右春坊右庶子兼翰林院侍讀掌坊事吳宗達

制曰：朕光纂洪圖，肇辟新政，方將揚兩朝之大烈，建一代之遠猷，而寡昧未學，憊焉思奮，所賴皇祖貽以豐芑舊德，迪我冲人，其公忠該練之臣，懷嘉謨而入告，敢不以報。爾右春坊右庶子、兼翰林院侍讀、掌坊事吳宗達，蚤登上第，遂踐清塗，既歷詞垣，乃躋中護；濟世美以特立，裕辰猷而具臧；屬辭義比陽秋，得士人當驚代；青霄接武，光騰文海之鯨鼈；白日懸名，棧起蓬山之鸞鷟。蓋冰局清介，自屬嘗操；文苑詞章，特爲本業。爾其抱堅明沉識，凜四知以成能；抒經濟宏材，兼三長而擅美；則深心勁骨，節明亮謨，尚資啓沃之忠，式展弼諧之略。茲以覃恩，授爾階奉政大夫，錫之誥命。爾以韶年，當皇祖簡授句臚之曉，閱三朝爲新也。爾家諸父不聯跗金馬，耿耿抱大節乎？國恩可副也，家學可承也，以爾氣骨，用爾材誠，勉迪前人之麻，其新當世之務，懋之哉，尚有遠注。

右春坊右諭德兼翰林院侍講周炳謨

制曰：朕以冲人，纂乃曆服，期于光揚烈祖之洪麻，唯是豐芑舊貽，朝夕納誨，朕所不憚，夙宵希縱。我皇祖初猷，亦唯是世學名德，左右我朝夕，遂俾予于治。爾右春坊右諭德、兼翰林院侍講周炳謨，乃原任通議大夫、吏部左侍郎、兼翰林院侍讀學士、掌詹事府事、贈禮部尚書謚文恪子義之子，清修介節，邃學宏材，持正大于和中，發精明于沉毅。爾其史垣檀譽，鎖院掄材，抽書靡間于丘墳，得士頓兼于文武。緝經攝史，亦纂其玄，侍幕入帷，靜綜其大。周